

skal draga með fullri dagatölu gæsluvarðhaldsvist ákærða frá 6. september-20. október 1979.

Þá þykir og rétt að dæma ákærða til greiðslu sektar í ríkissjóð, kr. 10.000.-, og komi varðhald í 20 daga í sektarinnar stað, greiðist hún ekki innan 4 vikna.

Þá ber og skv. 5. og 6. mgr. 5. gr. laga nr. 65, 1974 að taka til greina kröfu ákæruvalds um upptöku á filmuboxum þeim, sem fundust að Fálka-götu 3 6. september 1979 og innihaldi þeirra.

Að lokum verður ákærði dæmdur til að greiða kostnað máls þessa, þar með talin málsvarnarlaun skipaðs verjanda síns, Guðmundar Ingva Sigurðssonar hrl., sem þykja hæfilega ákveðin kr. 20.000.-.

D ó m s o r ð:

Ákærði, Eyjólfur Örn Jóhannsson, sæti fangelsi í 3 mánuði, en til frádráttar refsingunni komi með fullri dagatölu gæsluvarðhaldsvist hans 6. september - 20 október 1979.

Ákærði greiði sekt í ríkissjóð, kr. 10.000.-, og komi 20 daga varðhald í sektarinnar stað, verði hún ekki greidd innan 4 vikna frá birting dóms þessa.

Upptæk skulu gerð framangreind 3 filmubox ásamt innihaldi þeirra.

Ákærði greiði kostnað máls þessa, þar með talin málsvarnarlaun skipaðs verjanda síns, Guðmundar Ingva Sigurðssonar hrl., kr. 20.000.-.

Föstudaginn 6. apríl 1984.

Nr. 59/1984. **Ákæruvaldið**

gegn

William James Scobie

Kærumál. Gæsluvarðhald.

Dómur Hæstaréttar.

Mál þetta dæma hæstaréttardómararnir Ármann Snævarr, Magnús Thoroddsen og Sigurgeir Jónsson.

Varnaraðili hefur með heimild í 3. tl. 172. gr. laga nr. 74/1974 skotið hinum kærða úrskurði til Hæstaréttar með kæru 29. mars 1984, er barst Hæstarétti samdægurs. Krefst hann þess aðallega, að hinn kærði úrskurður verði felldur úr gildi, en til vara, að gæsluvarðhaldstíminn verði dæmdur skemmri en í úrskurðinum greinir.

Af hálfu ákæruvalds er krafist staðfestingar hins kærða úrskurðar.

Með dómi Hæstaréttar 19. mars 1984 var staðfestur úrskurður sakadóms Reykjavíkur um, að varnaraðili sætti gæsluvarðhaldi allt til miðvikudagsins 28. mars 1984, kl. 17.00. Í hinum kærða úrskurði er kveðið á um framlengingu gæsluvarðhalds allt til 27. júní 1984, kl. 17.00.

Hinn 27. mars 1984 var ákæra gefin út á hendur varnaraðilja og tveimur öðrum mönnum, sem taldir eru tengjast brotum hans. Var mál gegn þeim þingfest í sakadómi Reykjavíkur hinn 28. mars sl., og var ákæran birt varnaraðilja þá og þar. Er bókað í þingbók, að ákærði telji, „að efni ákæru sé rétt og hann hreyfi engum athugasemdum við henni.“

Samkvæmt rannsóknargögnum var varnaraðili handtekinn á Keflavíkurflugvelli hinn 23. febrúar 1984, 45 mínútum áður en flugvél, sem hann átti far með, átti að leggja af stað til Bandaríkjanna.

Varnaraðili hefur verið ákærður m.a. fyrir rán samkvæmt 252. gr. almennra hegningarlaga nr. 19/1940, og var skotvopni beitt við framningu brota. Féð, sem hann komst yfir, er í ákæru talið nema 1.839.134.00 krónum.

Miðað við dómvenju og með vísan til forsendna hins kærða úrskurðar, sbr. og 2. tölulið 67. gr. laga nr. 74/1974, ber að staðfesta hann.

D ó m s o r ð:

Hinn kærði úrskurður á að vera óraskaður.

Úrskurður sakadóms Reykjavíkur 29. mars 1984.

Ár 1984, fimmtudaginn 29. mars, er á dómþingi sakadóms, sem háð er í Borgartúni 7 í Reykjavík af Ármanni Kristinssyni, Jóni A. Ólafssyni og Jóni Erlendssyni sakadómurum, kveðinn upp úrskurður þessi:

Með ákæruskjali, dagsettu 27. mars 1984, gefur ríkissaksóknari William

James Scobie, Barmahlíð 35, Reykjavík, fæddum 27. apríl 1962, að sök rán, sem lýst er í II. - III. kafla ákærunnar þannig: „Ákærðu William James Scobie og Ingvari Heiðari Þórðarsyni er gefið að sök að hafa í sameiningu og eftir fyrirframgerðri áætlun staðið að ráni á leigubifreið föstudagskvöldið 17. febrúar 1984, um kl. 19:30, ákærði Ingvar Heiðar með því að aka meðákærða William James í nágrenni við Hótel Sögu í Reykjavík, þar sem hinn síðarnefndi yfirgaf bifreiðina klæddur dulargervi og vopnaður hlaðinni haglabyssu, sem hann hafði sagað framan af, sbr. kafla I hér að framan, og ákærði William James með því að taka þar leigubifreiðina R-320, setjast í aftursæti hennar og biðja um að fara að Hótel Loftleiðum, en síðan, eftir að komið var langleiðina að Hótel Loftleiðum, að ráðast að bifreiðarstjóranum, Erni Reyni Péturssyni, Kambsvegi 1, Reykjavík, grípa hann hálstaki og jafnframt beina byssunni að höfði hans og hóta að hleypa af henni og neyða þannig bifreiðarstjóran til að aka veg í áttina að Nauthólsvík, yfirgefa bifreiðina þar og afhenda kveikjúláslykil hennar. Ákærði ók síðan á brott á bifreiðinni svo sem hér á eftir verður nánar rakið.

Framanlýst háttsemi beggja ákærðu telst aðallega varða við 252. gr. almennra hegningarlaga en til vara telst atferli ákærða William James varða við 233. gr. og 1. mgr. 259. gr. almennra hegningarlaga, sbr. lög nr. 20, 1956, og atferli ákærða Ingvars Heiðars við sömu refsíákvæði, sbr. 1. mgr. 22. gr. almennra hegningarlaga.

III. Rán.

Ákærðu William James Scobie og Ingvari Heiðari Þórðarsyni er gefið að sök að hafa í beinu framhaldi af ráni því, sem greinir í II. kafla hér að framan, í sameiningu og eftir fyrirfram gerðri áætlun staðið að ráni á kr. 1.839.134.-, sem tveir af starfsmönnum áfengisverslunarinnar við Lindargötu í Reykjavík voru að flytja, laust fyrir kl. 20:00, í næturgeymslu Landsbanka Íslands að Laugavegi 77 í Reykjavík, ákærði William James með því að aka, í beinu framhaldi af ránsbroti því sem greinir í II. kafla hér að framan, rakleiðis að Laugavegi 77 og leggja bifreiðinni á bifreiðastæði bak við húsið og biðja þar fyrrgreindra starfsmanna áfengisverslunarinnar og ráðast síðan að öðrum þeirra, Konráð Konráðssyni, Fannborg 3, Kópavogi, þá er hann bjó sig til að setja peningana, sem komið var fyrir í fjórum þar til gerðum töskum og plastpoka, í næturhólfíð, og miða á hann hlaðinni haglabyssu og hafa uppi hótanir um að hleypa af og því til áréttingar að skjóta einu skoti í bifreið þá sem mennirnir voru á og slá síðan til Konráðs með byssunni og jafnframt að hleypa af öðru skoti og neyða Konráð til að láta lausan pokann með peningunum, sem ákærði þá greip með sér og ók á brott á bifreiðinni R-320 sem leið liggur að Brautar-

holti 2, þar sem ákærði yfirgaf bifreiðina og fór yfir í bifreið sem meðákærði Ingvar Heiðar beið þar með, eftir að hafa sótt einn peningapokann sem ákærði William James hafði misst, að bankanum. Ákærðu óku síðan út á Kársnes í Kópavogi, þar sem þeir losuðu sig við byssuna og skotfærin, og síðan að Barmahlíð 35, þar sem ákærði William James fór úr bifreiðinni og tók með sér pokann með peningunum. Ákærðu skiptu peningunum á þann veg, að ákærði Ingvar Heiðar fékk í sinn hlut kr. 360.000.-.

Framanlýst atferli beggja ákærðu telst varða við 252. gr. almennra hegningarlaga en hlutur ákærða Ingvars Heiðars *til vara* við sama refsíákvæði, sbr. 1. mgr. 22. gr. almennra hegningarlaga.“

Er ákærða William James Scobie ennfremur gefinn að sök þjófnaður á haglabyssu og skotum.

Ákærði hefur setið í gæsluvarðhaldi frá 25. febrúar 1984, og við þingfestingu málsins í gær gerði ríkissaksóknari kröfu um, að William James Scobie sætti gæsluvarðhaldi til miðvikudagsins 27. júní 1984, klukkan 17:00, eða þar til héraðsdómur gengur í málinu.

Ríkissaksóknari vísar kröfu sinni til stuðnings einkum til þess, hversu alvarlegar sakargiftir eru.

Ákærði William James Scobie hefur mótmælt kröfunni, og hefur af hans hálfu verið lögð fram greinargerð í málinu.

Samkvæmt 4. tl. 1. mgr. 67. gr. laga um meðferð opinberra mála nr. 74, 1974 og með vísan til framanritaðs er krafa ríkissaksóknara tekin til greina og ákærði, William James Scobie, úrskurðaður til að sæta gæsluvarðhaldi allt til miðvikudagsins 27. júní 1984, klukkan 17:00.

Ú r s k u r ð a r o r ð:

Ákærði, William James Scobie, sæti gæsluvarðhaldi allt til miðvikudagsins 27. júní 1984, klukkan 17:00.